



明滇南五名臣遺集

~ 16
2843
3



16
2843
3



嘉靖四年正月二十四日臣一清抱疴林中不意謬

以廷臣論薦承恩命起督師西征自度衰病不能負

荷上疏辭免既而使者齎勅符旗牌關防及欵賞白

金文綺俱至強起奉迎作詩志感

煌煌玉節引旌旄紫鳳銜書下碧霄心似老葵終抱赤身

如朽木恐難雕已無妙算紆邊計只合間居伴野樵懇疏

定知回帝聽移文休待北山招

辭免不允温旨褒答有卿素以體國自許諒不在趙

充國馬援之下之論強起力疾趣裝再賦一首

西北風塵帝顧多老臣承詔出巖阿便宜欲上趙充國夔

鑠還非馬伏波十乘戎行新節鉞三邊精采舊關河極知

明讀南五名臣集 楊文襄詩集 七二

早稻田大學圖書館
25.6.13
藏

君命如山重感激渾忘兩鬢皤

巡撫吳都憲受詔敦迫上道設祖宴予席上有詩次

韻答之

部將門生半已翁衰齡還復起臨戎百年氣運時方泰萬里雲霄日正中出入敢云均將相姓名深媿自兒童相交莫謾勤推轂廊廟經綸有鉅公

予先年總制陝西謝病歸江南宿鄭州察院有詩題壁間人蓋不知爲予作也比再起西征壁間詩猶在今過求之壁新加泥飾詩不存矣默憶舊韻賦得一首

仗鉞還從此地過故鄉南望幾關河風塵荏苒途應熟出

入均勞歲已多旃擁織文先十乘劔揮白雪掃羣魔烟霞已負山靈約欲報君恩奈老何

望西嶽

萬朵芙蓉鎖翠烟紫巖千仞入層顛扶桑弱水蒼茫外積石龍門指顧前獨望丹梯懷捧日浪傳仙掌可擎天斡旋造化須神力早爲蒼生解倒懸

華州謁汾陽王祠比歲公卿臺諫齒及老朽姓名或以汾陽相擬茲奉命節制諸軍於陝西祇謁王祠下不覺自媿口占一詩

一木能支大厦顛令公忠義可回天威行朔漠三千里身繫安危二十年直以丹心扶日月長將赤手障風烟向來

薦剡虛相擬追憶遺功獨赧然

賀萬壽節後詣文廟行丁祭禮有述

環珮趨鏘肅漢儀邊城五夜漏聲遲請看玉振金聲地正
及鸞鳴獸舞時四海文明符泰運萬年吾道際昌期不隨
百辟歌天保聊效封人獻祝祠

九月二十四日諸將官破賊獻馘軍門予與巡撫王

都憲共舉犒賞之典用曹黃門所寄詩韻一首

偏師薄伐虜心寒露布朝騰遠近歡早向軍門傳將令不
教時輩笑儒酸西風落木山容淨白草黃沙鴈影單更喜
中丞新駐節滿城花鼓詫奇觀

花馬池官廳壁間有海山干公詩次韻一首

萬籟沈沈乍有無天寒月半輪孤戍邊甲士和霜卧出
塞將軍藉草鋪白骨不銷千載恨金城誰獻萬全圖旃裘
遠遁烽烟息不信茲行是畏途

固原重建鐘鼓樓當城之中央俯視四境予爲題
之曰鎮西賦得三律然未足以盡樓之勝也

西閣風高鼓角雄南來形勝倚崆峒青圍睥睨諸山繞綠
引潺湲一水通壑壤有歌農事足折衝多暇虜塵空登樓
不盡籌邊意渺渺龍沙一望中

重出
設險真成虎豹關層樓百尺枕高寒重城列戍通三鎮萬
堞緣雲滂六盤絃誦早聞周禮樂羌戎今著漢衣冠分符
授鉞知多少誰有勳名後代看

千里關河入望微
四山烟樹翠成圍
蒹葭淺水孤鴻盡
菡萏秋風萬馬肥
聖主不教勤遠略
書生敢調識戎機
狂兒已撒穹廬遁
體國初心幸不違

重出

中牟公館與獻吉提學話舊用前所寄詩韻

遠從西嶠越南裝
忽得君詩抵夜光
門外尙懸貔虎節
夢中先著芰荷裳
宦情久與禪機寂
世味惟應蔗境長
三十年前曾讓子
知言竊比宋歐陽

十二月初十日有旨念臣一清拜起艱難免其朝參
只在內閣辦事志感一首

聞道免朝新命下
帝憐老病怯朝寒
許身尙覺鷹揚健
稽首翻愁虎拜難
兩鬢早驚衰後白
一心長抱少時丹
已無

尺寸酬明主更沐殊恩敢自安

送大司空趙西峰歸廬陵

臨民不久更臨戎
學在春秋一部中
周雅舊歌戎有翰
舜廷新命若予工
明農帝已嘉誠款
勇退吾方走下風
好事西峰峰上月
清光留取照丹衷

哭林見素先生

丹陽古渡日初陰
送別臨歧兩不禁
萬種閒愁三日話
一
剡清源百年心
嘉靖癸未之秋見素得告致仕過鎮江琴
留宿三日予送之丹陽道中日暮而別
亡尙覺遺音在
瀾倒方驚砥柱深
一自尙方曾借劍
英風凜凜到於今

四朝勲業萬夫雄
海內人人仰素翁
佛骨燒來韓吏部
淫

祠毀盡狄梁公同心話憶金蘭舊異姓家憐骨肉通亦有
生芻何處奠祇憑詩句寫哀衷

新春自述二首

嘉靖四年今八年病翁一出久妨賢應憐齒髮全非我何
止聰明不似前臺省同朝無舊侶門牆多士盡華顛從頭
檢點半生事祇恐中心或媿天

七十六年哀病叟四千餘里未歸身一邱一壑本自足旅
進旅退非吾真寸心未敢負天地垂老豈知逢聖神笑看
春草又新綠歲晚相對惟松筠

送大司馬靜庵胡公得請致仕還鄉二首

中朝司馬去何之病得歸閒荷主知志本無私甘自默言

常過激任人嗤官登極品家如水憂在蒼生鬢有絲我老
未歸君早退江雲回首動遐思

南入炎荒毒霧深東來絕塞苦寒侵一生不作脂韋態萬
死難移鐵石心曾聽高山驚古調更從烈火試兼金年來
已覺同遊盡欲賦驪歌恐不禁

致仕出城途次口占

北風吹土黯衣裳久客懷歸意渺茫六十年來三致仕四
千里外七還鄉予自中書謫告南歸歷官中外至是七歸鎮江云君臣義重真難
報天地恩深敢斲忘遙想家園籬下菊清香不改舊時黃

紅白葵

宮粧艷相競霓舞紛駢羅芳姿不入賞人情輕所多

白水江舟中

小舟搖曳坐還興把卷揮毫總未能猶勝鐵山山下路自
驅羸馬踏春冰

廉泉

山腰飛瀑與雲平滙作寒潭徹底清只恐有人來洗耳臨
流不敢濯塵纓

碧桃花

猶記看花紫陌回一年一度向人開春風本是無私物何
必玄都觀裏栽

興隆寺

三日興隆寺裏齋彩幢繚繞覆天街過門不敢長驅馬上

有君王萬歲牌

畫馬二首

世上孫陽不易逢千金浪說馬羣空豈知掣電追風足不
在驪黃牝牡中

天驕牧馬大河邊二載王師未凱旋約束龍驤三萬匹將
軍指日到燕然

宿徐州

警柝聲嚴院鑰深一燈無語夜沈沈多情合是窗前月照
見平生鐵石心

五月十八日入京師時已得旨羈候在外病中言懷
青天極目浩漫漫高鳥晴雲意自閒回首關山戎馬地丹

心贏得鬢毛斑

天近從知易得春病中情思夢中身連章莫道承恩晚猶有圍屏未脫人

生平直道任人嗤日倚青天白日知不是流言真可畏祇緣才薄負明時

晚蠅雜蚊而飛

白羽風多不住揮晝蠅狂帶夜蚊飛病多血肉無多在何物營營未息機

書夢

生來無計荅乾坤一飯從知是帝恩怪底夜舟眠不穩夢中猶自叩天關

舊扇

千年用舍一行藏此道分明白日光不是秋風多棄物人心元自有炎涼

直河

直河之水直如絃亦復千年在道邊縱使封侯真可信不將一曲受人憐

渡江十首

心驚詔獄眼添昏完壁歸來是帝恩不用臨風傷往事餘生何以答乾坤

濃花萬點麗神州翻遣茲行作勝游歸到故鄉看物色青山依舊枕江流

風塵冉冉路漫漫一笑渡江天地寬
合遣蒼頭持短刺遍投親友說平安

江頭如聽可人招鼓枻放歌歌
次寥秋色滿船月皎皎水聲入樹風蕭蕭

世故撩人西復東園花開遍幾番紅
從今老子都無事江上尋詩滿袖風

五十五年知昨非北山心事悵多違
自慚不及沙頭鳥春去秋來舊處飛

手提文柄復兵權說著平生一莞然
老去不尋方外事睡烟歌月是餘年

只合烟波把釣竿虛名偶爾博高官
多情江上團團月猶

照當年苜蓿盤

玉關人老貂裘做白雪歌寒鐵硯存
已辦輕車隨款段尋

幽日日水西村

一尊休放酒盃空報答江頭拂面風
故舊相迎莫深問人

生半醉半醒中

藥欄漫興

好花開遍故園春猶踏長安陌上塵
我正憶花花笑我幾時歸作灌花人
重出

後堂葵花

錦標高簇翠房深早向驕陽露寸心
不是花神甘附熱要從烈火試真金

涯翁以所書蜀道難詩卷見贈夜間偶取松雪書并觀之感而有作

謫仙文字古今才對卷分明劔閣開合有神靈爲訶護夜深風雨霎時來

愁絕峴巖勢欲摧白詩公字兩奇哉宋代王孫元學士只將姿媚寫崔嵬

得東山翁書病不能答口占絕句寄意

一臥空齋兩月餘聖恩未許賦歸與錦衣肉食渾無補慚負江東舊草廬

題畫一首

江南無處無幽棲拄杖獨往窮攀躋莫教迷却歸時路春

雨夜漲桃花溪

和西涯先生漫興

日日蓬門爲客開兒童熟客不須猜底事東風亦愛客當筵時送落花來

曲巷回廊隔市聲花徑不掃莓苔平多情山鳥解人意何處飛來時一鳴

西莊果實太未稀房山鯽魚也自肥一般風味足可樂何必故鄉方是歸

聞君抱病掩柴門數月不出城西村願得太平風日好浮生何地不乾坤

見素得乃子達進士報有詩示達子爲次韻寄之

極知爲學是爲山九仞工夫莫放間俯仰乾坤如許大只
留些子在中間

老覺間中歲月遲春花秋日總相宜一元氣數今何世欲
起羲皇一問之

見素臨滄亭次韻

幾載馳驅蜀道長聖恩今許老耕桑人來物色知何處不
在山鄉卽水鄉
白日清尊引興長蕭然風致古柴桑孤雲野鶴亦有意伴
我頽然入醉鄉
生計歸來願頗長男勤耕穫女蠶桑但教俯仰都無累便
是神仙不老鄉

閱王堯卿所著天地正氣編有作

下履坤輿上戴天君臣大義日星懸要將赤手扶八極請
看山人正氣編
正氣生來本浩然養成金石故能穿不然萬折狂瀾裏一
柱安能挽逝川
把筆慚爲諧世文直從魯史究皇墳不收功業收忠義扶
植綱常意獨勤

古者自王宮國都以至閭巷莫不有學今庠序徧天
下而鄉學之制多忽而不講蒙養弗端有以也才不
古若實基於此吾滇南毛給事用成家居時慨然有
志風化嘗市城中地建書院延請明師以教鄉人子

弟而躬督勸之甚盛舉也過鎮江以質于予予謂書院古有之而今不數數見用成之意蓋欲端本澄源以爲成德達才之地此可與知者道耳爲名之曰養正且賦四絕句以遺鄉之人俾知所趨向云

王化千年跡已微後來蒙養教全非知君有意敦風教未學從今得指歸

聖朝庠校徧寰中鄉社猶資養正功讀罷詩書還習禮此心何止發蒙童

一簣元來九仞基升高行遠在人爲吾鄉無限民間秀不用擔簦自得師

上達工夫子細探莫將實理付空談要知作聖希賢意小

學分明是指南

題書送謝梅歧歸閩

有足不踏風塵車有手不草封禪書茫茫天地誰知己還指梅花是故廬

風頓止江波鏡平喜賦

積雨顛風忽放晴日華高射令旗明江神解助天心順約束魚龍不敢驚

千藥丹

世人看花愛千葉我愛葉多心不多留取傾陽方寸在不然無奈此葵何

破虜謠

有序

嘉靖四年八月十八日大虜在莊浪以數千騎浮
渡黃河入靖虜地方河外賊聯營劄立意在探我
道路窺我虛實將與套賊合謀入寇靖虜將官出
兵禦之斬其先鋒一人報至回原督府發兵追勦
賊見兵至伏山谷間兩日夜人馬饑乏乃鼓譟而
出我兵追之不敢逆戰經寧夏界上虜居人丁畜
由鹽池石溝中空以出將遁歸套中督府先是已
布置諸軍於各路按伏蓋防套賊入境不虞寇自
內出檄寧夏諸軍合兵追勦賊迎戰數十合多所
斬獲賊既不得逞乃委其所掠并所用馬器以遁
至邊牆邊兵遏之不得出斬首百級賊無計率其

輕騎復奔腹裏將由舊路以渡我兵追及迎戰
走又斬首數級驅至河爭浮渡河漲盾陷沒焉尙
有百騎達西岸去賊僵屍澗谷墮崖塹以死者多
馬匹死傷枕籍道路諸軍旣罷散猶有十騎奔至
邊牆棄其馬匹械器緣牆而出蓋自是花馬池定
邊營牆外數百里無復賊蹤矣諸將恐其報復未
敢掣兵然此田中之禽占利搏執非貪功好殺者
此當无咎乃采邊人之語爲破虜謠

大呼陷陣殺聲雄不見羣兒在眼中砲火雷飛箭星落回
頭一霎虜塵空

沙場鏖戰月昏黃夜色慘淡星無光明早轅門報功次將

軍親驗血衣裳

將軍威武不可當
千騎萬騎皆騰驤
會須踏破天山缺
淨洗腥羶復故疆

白旆央央西出關
三千鐵騎盡歡顏
大將端居若無事
但聞人唱凱歌還

巡邊偶吟

老將臨戎古有之
周家方叔唐子儀
不聞七十章逢叟
來總熊羆百萬師
年年此地遭狂虜
今日巡行是坦途
極目龍沙千百里
竝無一騎踏平蕪

韓公遺跡不須問
范老經營說到今
今代輿圖非弱宋
良

工獨苦是誰心

浴泉二絕句

平生巾屨本無塵
我有盤銘不離身
道上黃塵千萬斛
一湯浴得幾時新

雲竇淙淙空復深
開元蒙恥到於今
爭似箕山洗耳水
能洗世人名利心

王太史舜卿謫戍茂州過鎮江相見愴然因憶乃兄

堯卿感而有作共得三首併錄贈之

歧路豈不多君胡
此行役朝爲近侍
臣暮作遐征客
平生忠信心偃仰
無欹側江山助
詩豪風露壯行色
欲語不得盡雲鴻
渺南北岷峩故
崔嵬劍閣何偪仄
稅駕行有期君

恩本無極

汝兄在西州昂昂萬夫雄高視千古前濶步無塵蹤宵爲
叱仗馬不作羅網鴻季方踵其躅雲霄共飛翀仕止各有
存乃心王室中危言仗有道何暇恤其躬日月豈不光江
海豈不容臣罪法當竄守節甘無窮

八年不見子一見翻成悲微生萬死餘毛髮渾未衰君心
無回曲神明相護持一觴復一豆遲子江之湄蕭蕭黃葉
下黯黯寒雲垂殊方亦王土蜀道無險巖義命夙所安慎
勿陋居夷材大用良難各出忌乃隨易爰戒尚口此意君
自知

初見花

家園有名花夙昔夢見之晨起步前除葵生鬱萋萋輕風
薦微馨朗日耀其輝居然避光春抗茲炎熇威金盃溢零
露玉笋紛素蕤庇足豈不智蔓引將何爲豈無桃李顏緣
多不入時君子貴自恒襄擲何足悲

送谷君嗣興之丹陽

疾風撼省樹急雨捎盆荷驕陽變炎熇老鬢益衰皤顧瞻
長安道病暍亦已多君行向南州溽暑將奈何農家粒粒
心日午方鋤禾乃知循良吏所急非催科奄奄待盡徒忍
復加撻訶於人苟有濟甯暇郵其他煩將一寸丹爲民起
沈疴

夙興趨建禮天門尙殘月雨聲霎然來雲暗彤龍闕蒼茫

雷霆門詰日不肯歇退朝逢使君過我告明發贈君無長
語但云民力竭功名貴及時壯老真倏忽保茲連城珍慎
勿貽玷缺

題沈石田山水贈高鐵溪貳守

嗚呼絕藝多天成吮毫妙泄天之精胸中倘有萬丘壑氣
運潑潑隨風生古人縑素多漫滅零落數紙令人驚按圖
索駿竟何事如舍其骨求其形大江東南石田老山川風
味嘗應飽門前索畫如索逋墨汁朝朝爲人掃太窮天地
細蟲魚信手爲之翻大好此圖此景知何時烟雲不礙山
城曉坡陀縈複路逶迤一峯特立蒼冥表山北山南青未
了處處琪花雜瑤草山頭老幹屈鐵回山下髯龍何天矯

山坳靚深堪結廬翠竹爲帷樹爲葆青鞋布襪秋復春幾
送餘霞落花鳥松根老人行復休醉歷崎嶇歌窈窕足音
空谷已難聞相逢且試開懷抱乾坤安得此區寰我欲從
之心悻悻不是匡廬是武夷細觀無乃天台道人言此格
黃大癡意在筆前非藉橐春蠶見物繭即成或有神功爲
施巧世間真贗不可知夜光魚目翻相嗤好事之流滿天
下君看賞鑒者爲誰鐵溪道人房山後平生豪素常在手
近時朝士能丹青永嘉三子黃姜柳君今並起稱四豪俗
夫吐舌羣工走公餘坐我池竹邊徧檢瑤笈翻牙籤判評
好惡析幽眇如以藻鑑分媿妍酒酣指點到石田把翫再
三真可傳果然名下無虛士贗物紛紛空賣錢感君意氣

報君誠願比干將當留別此人此物不易遭在我在人誰
失得珠光合浦浮雲薄豐城劍氣凌碧霄君莫展向雷風
朝只恐精靈化神物騰空一去難爲招

畫馬二首

昔年簪筆螭頭下慣見官墀立仗馬雲雷變化龍有神乘
黃誰遣歸圖畫雙瞳夾鏡耳卓錐雄氣不受人間羈玉鬃
輕揚蒼尾動落花浸帶浮塵飛天閑騏驥粟盈石獨立西
風臥斜日長嘶要蹴崑崙碧邊頭戰馬身帶劍長稽短豆
空蕭瑟

雲蒸霧擁天降精古來異物非虛生渥洼龍種不世出白
沙汗血今知名千金遠致華軒下意氣深沉更瀟灑青絲
玉勒秋復春長恐乘風遂神化曹韓妙思悟者證紛紛書
馬空毛皮人間豈復生伯時此圖經營竟誰學果然廐馬
堪爲師

自汧陽往寶雞風雨大作溪漲不可渡阻村寺中兩
晝夜至寶雞聞南關爲水所衝民多壓溺者作長句
以紀之

七月七日趨寶雞出門先涉汧陽溪是時雨餘秋水足村
村禾黍青連畦車行齟齬進還却一分瓦礫三分泥蜚廉
怒號驅人至豐隆奮起爭神異雲拖雨腳疑有無白日深
山暗嵐氣須臾挽却天河翻恍惚蛟龍在平地馬前物色
不可辨但覺飛泉滿衣袂俯臨巨壑仰高原敗木摧巖動

交墜有耳如瞶目如盲有足更如舟不繫平時賁獲難爲
強倉卒良平失其智已將薄命寄一髮未必痴兒全了事
孤村迢迢步轉遲僕夫掩面啼寒飢布禪如石屨如鐵牙
齒戰擊肩過頤金陵河深渡未得指點僧寺求棲依驅車
徑造寺門裏有一老僧面如鬼焚香露頂走相迎破屋數
間而已矣行裝隔河追不還欲寢無衾食無米便須假息
無外求枕瓦和毯聊爾爾雨聲徹夜急不停向曉淙淙聽
尤駛門前寸步皆陂池偃僂空堂剛尺咫洪流注墻墻欲
傾顛風撼門門亦靡床榻漏濕勿復道正恐波濤蕩堂址
東泝西隴俱阻絕心欲奮飛難脫屣村農知我困泥塗負
擔挈壺勤數子麥粉春來銀縷長溪芹採得青絲美因之

撫慰兼咨詢今歲秋成定何似長安亢陽數月許赤地茫
茫極愁子向來雨澤頗沾足復恐秋霖敗禾黍自從關陝
頰告荒白屋蕭條廢耕耔扶傷那忍重遭傷哀此鰥仞置
何所農兒稽首雙涕流知公夙抱蒼生憂我貧未離桑梓
樂公行豈爲身家謀衣裳黯淡塵土色頗聞一出春復秋
吾儕野人本無識一語合比千金酬秦人氣概雄天下况
復知方如此者誰云忠敬代有宜彷彿民風是殷夏居常
濫給五升粟應變空懷萬間厦渠雖不語吾自知往事分
明成藟莖明晨雨歇趣駕輪灘頭水平石露痕百夫扶舁
強登岸直與魚鱉爭毫分南望陳倉四十里躑躅不進天
黃昏縣南郭門縣西村一夜墊沒河流渾孩童哭父翁哭

孫乃知吾生已多幸向來辛苦惡足論吁嗟乎人生夷險
信有數康莊豈必皆安步江湖逆浪猶堪泝君勿羨傷弓
之鳥但高飛亦勿笑歷塊驂騮初識路流行次止任天機
自保貞心向遲暮

畦拱貞所藏沈石田山水

石田毫素久擅場此圖二贈東用光詩才字畫亦不俗畢
竟未奪丹青長山高水澗鳥飛盡叢杉集篠迴林塘蓬門
蕭蕭絕車馬落葉不掃苔蝕墻松根兩翁相揖讓狀貌奇
古鬚眉蒼豈無王猷掉劍曲或有孺子歌滄浪有毫好畫
真成癖用光割愛不自惜楚弓得失皆吾人寶劍烈士非
輕擲白石清泉無處無世有真樂甯在圖青鞋布襪誰爲

侶吾已拂袖歸江湖

題閻允德畫贈孫廷賢

閻生拂袖歸隴山風韻盡落毫素間黃花紫竹傍幽石嫵
媚恥爲桃李顏初疑羣仙出閭苑金冠絳袍相追攀又如
壯士挺高節直教閭闔呈琅玕丈人坐受兒女拜氣岸俯
視千嶺旣當時下筆亦偶爾至今尺紙迴波瀾南徐孫生
號奇士爲道畫意非無端豈徒狀物兼比德人情物態元
相關我公功成合身退小子終當扞肺肝愛生賞識爲生
贈莫遺肉眼紛相看願言對此成三益共保貞心盟歲寒

百鳥朝鳳歌

乾坤大化何氤氳至和所鍾方出羣古稱四靈王者瑞羽

皇三百六十鳳凰爲之君崑崙之陽丹山穴有鳥有鳥文
五色威儀何止稱九苞體質分明全七德文飲砥柱湍朝
餐琅玕石和聲隨祥風異彩絢朝日覽德知時從去來不
信人間有增弋昔在軒轅天下治安乃巢阿閣乃止東園
眾鳥從之翩翩翩翩別如睢鳩序鴻鴈潔者鶴鷺文者鴛
華蟲孔雀各競彩鸚鵡鸚鵡紛能言奇毛性羽瑣瑣不足
數聳身注目俯仰萬態一一相向隨騰鸞帝曰噫嘻此何
祥乃召天老求其端候聲調管和律呂象形設色爲衣冠
金天繼至以瑞紀官虞儀蕭韶周鳴岐山從此寥寥千百
載王者不興靈瑞慳神雀丹鳳虛紀號謬指野鳥呼鳳鸞
遂令百禽失附麗空向朝陽矜羽翰梟雄鷲猛各扇毒羽

肉強食翻相殘吁嗟乎萬水朝宗眾星拱北此道天人同
一格當今聖皇御宸極一統華夷歸帝德鳳兮鳳兮胡不
來看畫題詩三嘆息

事平志感

關西之西天盡頭賀蘭外擁河中流溝澮繞田沃饒足衣
冠比屋絃歌稠朝廷分封作藩屏營衛列置燔如虬鎮巡
開府控夷夏百數十年無內憂誰其尸之失撫馭忍將財
力供誅求犬不吠盜猫庇鼠厲階生從葛與劉後來毒痛
徧海內更比漁獵窮羅搜泥沙不惜錙銖盡萬目疾視官
爲讎逆王乘之得藉口挾持叛將稱戈矛李姜新至不達
變池火禍作延安周鎮城白日恣屠戮流血濺地尸成邱

帝聞曰吁賊當討禁旅三萬如貔貅腹心近臣出總督一
一指授皆神謀謂臣一清舊西帥往視予帥運爾籌臣卧
江南聞命起衝風衝雨驅官騶主憂臣辱分當死此恨合
爲西人酬豈知天誅不容宿豪傑奮作趨靈州鎮西元戎
妙節制內應暗約將軍仇昂首授首在頃刻逆黨一夕殲
無留帝聞曰都兵急罷二帥宜往宣鴻猷渠魁勿貸脅從
赦撫安之計須綢繆夏人填衢拜漢節雲霧如豁天光浮
市不易肆農把耒頓使慨歎成歌謳遺孽纍纍悉就縛檻
車百乘隨俘囚總督還朝臣留鎮杞人無識翻多愁荆棘
根存旋復長膏肓病在難爲廖社鼠城狐尙逃死有日不
照陰崖幽臣身區區已許國會須抗疏陳宸旒

春林牧牛圖

東風入地萌芽生野水散漫陂田平杏花村裏清明節樹
頭布穀催農耕放歌拍手長林下半是農家牧牛者自言
牛背穩於舟更詫騎牛勝騎馬烏糞沙底和犢眠老捋徐
行相後先却顧長鳴待其犢日光炯炯頭昂然芳草青青
暗郊藪牧兒叫呼隨犢走數幅煙蓑溪雨深一聲羌笛山
雲吼牛饑牛飽恒由人兒怒鞭牛牛不噴物生有欲皆可
制龍亦可參虎可馴大化流行生意滿斗柄斟調註付管
中原餓孳仍塞途相國徒然問牛喘嗚呼牛功在人牛不
語坐食無功吾愧汝潢池美兵今未休安得賣刀齊買牛

呂紀雪圖

玄冥令嚴氣栗烈釀作江城三日雪朔風捲地天冥冥四
顧青山黯無色是時同雲凍不收咫尺川梁成阻修瀟陵
豪客方閉戶剡曲幽人難放舟山禽在原半在隰欲飛不
飛毛羽溼渺渺平沙落鴈多蕭蕭古木羣鴉集天寒日暮
恒苦飢欲覓顆粒將安之長安貧者亦無數遑用恤此禽
蟲爲四明畫史清狂客決眚大呼聲裂帛畫裏風清祇自
知賦罷令人三嘆息

七月二十五日紀異

嘉靖之元壬午歲維月建申日巳巳蜚廉怒號東北來急
雨猛厲隨風至初疑蛟龍吼巨壑復訝雷霆鬪平地長空
轟匝坤軸動恍惚神靈驅百魅浪花千疊大於山震走天

吳奔屨履江翻見底石露根屋廬在田魚入市大木千尋
如拔毛萬瓦飄揚飛蝶翅南艘北艦一時撲末論千金輕
委棄漂屍積齒塞川澗過者不敢張目視夜半潮頭高數
丈遠近呼噪聲騰沸江南老岸猶自可哀此沙鄉禍尤熾
死者滅沒隨洪濤生者攀緣繫高樹廬無遺粟竈無烟村
雞不鳴犬不吠我時扶病坐復興達旦彷徨不能寐耳目
所及已如此比邑殘傷將類是杞人過憂翻自嗤夸父狂
逐終徒斃顧遣和氣成災沴洪範庶徵須省念此變無乃
臣工致人可勝天理則然爲代民謠聊紀異

鑒賞歌贈燕山葉原靜

畫家六法古有評氣韻生動由天成妙品在意兼在骨不

然筆墨徒經營前朝好手亦無數殘縑斷素令人驚王維
鄭虔不可見後人但知宋苑名近時愈變嗟愈下模擬誰
復採其精少年愛畫癖成性購求至與人相競當時能畫
三五家常持卷軸求商訂匏翁謂我今劉侯我笑不言心
自慶王事鞅掌三十春圖史不得隨車乘老歸江南理篋
笥霉損蟲傷能幾剩舊知零落不復存晚得燕山葉原靜
白巖鑒賞今鮮倫昔曾向我誇葉君聞君携家住淮甸折
東招至留彌旬果然名下無虛士坐上咳唾生風雲詩才
字畫亦不俗何止丹青能壓羣坐君遠菴翻卷帙信口高
論吾不嗔判評品格入骨髓不遣純駁差毫分丹邱博士
已莫觀如君者世間肉眼紛紛難共論我有鴉溪七尺強

煩君爲我圖滄浪墨汁淋盤試一掃但見元雲漠漠橫高
堂遠山霏微起烟素東影弱水西扶桑奔湍迸石三千丈
跳珠下濺寒聲激烈滙作江流長蒼茫直與鬼神接奮迅
恍若蛟龍翔兩翁笑語毛髮動山水之樂樂無央王宰豈
受人促迫象先不與世低昂得心應手自成趣眾工俗筆
徒誇張吁嗟乎胸中邱壑故有真未須論畫先論人古稱
孫陽善相馬脫略形似看風神君不見陶雲湖吳小僊隨
意塗抹能賣錢風塵意態花柳姿縱有佳處名教之中奚
取焉愛君博雅服君識一爲歌行壯行色君行蹤跡寄何
方看畫吟詩兩相憶

積雪

至後新陽復春前積雪深江山萬里色天地一元心荏苒
歲云暮馳驅力可任前程不須問緩轡且行吟

甘涼道中書事感懷雜詩

寥落窮邊路艱關未足論寸心勞益壯雙眼病來昏石壁
磨崖字沙場濺血痕毛錐異長劍何以答君恩
望望日以遠行行春又闌蒼茫青海月咫尺玉門關北闕
星辰上南州夢寐間青山隨處有一見一開顏
潦倒天涯客逡巡塞上車驚心是烽火病眼更風沙雨暗
秦川草春明長樂花良辰莫言負吾事在公家
到處寒帷問邊城近若何敵塵今去遠兵食向來多萬馬
肥能躍三軍飽欲歌翻思昔年苦清淚幾懸河

搆穴兵何速奔驅不暇謀成功莫張大後計必綢繆寨守
須乘險兵防不待秋但教戎馬息何用覓封侯

戎王我封國乞救急於焚天子初頒詔元戎便策勳開邊
豈秦漢字小是湯文膽落西方虜飛來何處軍

千里齋糧地輕兵掩襲時羌戎背盟約將相起猜疑不敗
非天幸成功豈力爲由來百萬眾不敵有名師

敵愾諸侯義輿尸弟子羞云胡諸將出獨少萬全謀孟獲
降心日康居授首秋誰云戰爭事得失不須籌

駿骨委塵埃彫傷氣未回臣心須保障帝德本懷來大勇
貴能戢邊功莫更開芻蕘要深察狂瞽謾相猜

絕塞無關隘多防虜騎衝層巖堪立塹平地可成壩民力

須深惜邊儲不易供一勞還永佚此計莫從容
榆林昔多事烽火時時驚邊牆一朝築關塞十年清怨去
恩常在兵閒民樂生九原不可作司馬是長城

瀛海道中襍作四首

北關戀宸居西風悵別餘樹烟山色盡舡月海聲初往事
十年夢鄉心一紙書歲華空復暮猶自病相如
潦倒思鄉客遲徊遡浪舟樹連雲外寺城帶海邊樓病濕
偏愁兩年衰不奈秋偶然談世事猶動廟堂憂
天空秋有籟海近夜通潮獨樹如相待羣鷗不受招貧餘
詩券在愁仗酒兵消何用談生計故山隨老樵
四顧天無際歸心正渺茫秋風動禾黍落日下牛羊野寺

苔生院人家茅覆墻衣巾半沾涇知在水雲鄉

中衛道中

落日平沙遠西風白草新野豬傷稼盡牧馬過壕頻嶠雪
不知暑磧花空復春相逢莫深慨吾亦未歸人

和西涯先生獨酌二首

相思不相見吾已負幽期病止陶潛酒愁深杜甫詩感時
眠未穩謝客起常遲料得微醺意堯夫獨自知
一卧經三月間居事事幽真成病裏客悔不健時休過眼
鳥歸樹傷心花近樓西堂有高興聊向句中求

送唐雲卿歸江南

老去吾多過秋來子又行孤燈獨自坐片月爲誰明江海

明倫彙編 家範典 卷之三十一
三十一
憂時念冰霜作宦情滄浪近吾舍曾與白鷗盟

和韻送吳舉人文之

江空飛鳥盡雨過落花深抱病方孤坐逢人時一吟會遲
幾失子別易忽驚心猶有相留興開樽醉竹陰

和與成登城韻

落日街頭樹殘花送晚春乾坤容縱目江海羨知津懷古
百篇壯感時千慮心昏鍾動城邑猶自有行人

得王陽明詩依韻寄答

聞變幡然作親提一旅孤機槍浮太白氛祲暗重湖慷慨
平原義周旋甯武愚成功何易易帷幄妙訂謨
冰霜爲別日轉眼又春歸許國身方健除凶願不違寒暄

今契濶道誼昔因依抱膝渾無語陰雲暝夜扉

戎馬艱闕際風塵瀕洞時心應懸社稷身已繫安危功大

翻招忌愁多恐易衰馮唐年未老終動漢皇恩

多士從河飲俗儒徒管窺平生抱經濟應變益權奇風雨

孤燈夜鶯花漫興時彩雲何處札聊得慰相知

應盡風波險履茲陽道亨通儒自適用大勇不須兵急雨

驚春夢停雲繫遠情中冷有玄酒相見爲公傾

用王陽明韻寄伍時泰廉憲

刺史勤王義中丞是指歸功成人共仰名出事多違赤手

烟霄接丹心日月依入鑿勤造父何處叩彤扉

洪都忽兵變舉目是瘴孤抱恨聲騰野流腥血洗湖平生

慕汲慙避難豈柴愚偃武從今日敷文仰聖謨
江湖血戰日豺虎遘凶時祖述先讐賊王尊豈避危冰霜
節操苦風雨鬢毛衰獨立蒼茫外長吟有所思
相從記童稚數載不園窺一得湖南僑遂爲天下奇隴雲
吟望處江雨夢醒時未得談衷曲幽懷祇自知
荏苒歲云暮馳驅路向亨片言能折獄弱冠已知兵江海
十年夢乾坤千古情相望不相見肝膽爲誰傾

和韻贈陳白沙

九重溫詔慰閒情聖代優賢禮未輕吾道不隨身共隱此
心真與月同明十年舊夢青山在一夜離愁白髮生我有
塵襟何處濯恥將名姓托冠纓

送林待用謫姚州

別意逢秋思不禁西風黃葉望中深一封竟作投荒計萬
死難忘戀闕心猶有圖書隨舊橐也宜山水助高吟生還
事業君須記况復霜華未上簪

送張兼素謫師宗

杏園曾是看花人回首風塵定幾春歷盡悲歡年未老閱
來夷險路方真乾坤俯仰丹心在湖海交遊白髮新如此
別離良不惡幾人青眼送征輪

謁咸陽王廟

香火高城廟貌崇邦人相對泣遺忠漢廷才望金車騎唐
代勲庸渾侍中地盡關山開禹跡人於絃誦識華風車書

又屬文明運猶有新碑記舊功

謁黔甯王廟

授劍從龍二紀強生占候相死稱王孔明威略終降虜充
國屯田坐困羌一代河山還帶礪萬年香火自蒸嘗仍雲
作鎮同封建未數元勳在漢唐

謁王忠文祠

六龍飛御五雲間遺孽居然敢肆頑元老竟遭希烈死漢
廷空望子卿還墓墟落落銘猶在廟祀堂堂詔始頒留得
文章兼節義不知曾汗幾人顏

抵家雜述

落日長松掃故阡聖恩真已到黃泉關山路盡九千里水

木心懸三十年絮酒幾人勞遠莫穹碑七尺看新鐫可憐
鸛鷺佳城地吾父遊魂獨渺然

聞陝西命下

聞道新恩下禁闈征車又逐暖塵飛烟霞實負山靈約桃
李虛傳物望歸心憶舊書渾欲忘眼看時事恐多違秋毫
未答君王賜敢向尊鱸道拂衣

黃河

活活真源渺未知乾坤於此判華夷鑿開積石從天降吞
盡羣流到海遲九里潤多資下土千年清合應昌期不絕
砥柱龍門在浩浩三川恐不支

秦州謁太昊宮

一自乾坤鑿混茫歷年四萬總荒唐不緣八卦抽神鑰誰
爲三才泄秘藏代有牲漁歸祭養人於書契托綱常極知
功德齊穹昊此廟何孤一瓣香

殺賊橋

墮地長虹望轉遙野烟寒雨共蕭蕭黃金誰緝封侯印緣
水猶橫殺賊橋村析尚煩傳夜警羌歌聊采代風謠居夷
蹈海非吾願一統車書屬聖朝

林黃門寸草春暉卷

落日乳烏啼遠林天涯遊子淚沾襟年年寸草自春色縷
縷衣裳惟苦心大統岡頭野雨暗鳳凰山下秋烟深微生
亦有終天痛欲賦哀歌愁不禁

哭樸菴宗伯黎先生

俯仰茲辰夢屢驚海天空濶恨難平極知燈火門牆誼不
盡師生父子情少小有緣勞接引疏頑何計答生成黃泉
萬一逢先子可聽人間痛哭聲

謁睢陽協忠廟

一旅艱關百戰中漁陽鼙鼓避英風城危竟失江淮蔽義
正終收郭李功滅賊死甘爲厲鬼擁兵生恨失奸雄年年
明水祠宮在不媿前朝表協忠

城頭六矢交鋒地帳下駢肩就戮時不信萬春非木偶果
然南入是男兒荒原落日孤臣墓古木秋風異代祠見說
履霜應有漸曲江忠諫本先期

讀李忠定公行狀

間氣生來命世雄，顛危之際見孤忠。
七旬五日匡時略，二百餘年養士功。
豪傑苦心猶戴宋，廟堂長策竟和戎。
南遷不返親征駕，禾黍空然繞故宮。

餞朱懋恭同年城南席上限韻

少日相逢已見推，中年此會本無期。
如何夜雨孤燈話，更作秋風遠道思。
流水心情聊自適，菜根滋味飽能知。
同遊頗覺同年少，那復能禁此別離。

江山又是一番秋，水落天空晚更幽。
細雨滄浪連極浦，夕陽紅樹遶平邱。
從君苦被冠裳縛，過我須教水竹留。
奇語京江數知已，不妨多暇與同遊。

豫旺城

冰霜歷盡宦情微，又上高樓坐夕暉。
野草燒餘邊馬瘦，塞屯開盡漢兵肥。
沙場估客穿城過，草屋人家罷市歸。
不謂荒涼今得此，當年肅敏是先幾。

次李獻吉贈張宗義韻

小坐籬邊日幾迴，江頭不作杜陵哀。
眼驚世事如花過，耳聽秋聲帶雨來。
野菊經霜甘隱逸，沙鷗忘我故遲徊。
時行時止吾人意，漫說雲臺與釣臺。

因益之得東山翁消息用韻二首
陪翁錄寄益之閑覽不必寄翁

慷慨西行未死年，敢將心事問蒼天。
忠能結主非孤立，計

不謀身見獨賢塞馬寒嘶青海月胡笳悲咽玉門烟江雲
迢遞飛鴻盡那得音書到酒泉

秋興八首

世事經心白晝眠天涯風物轉淒然山鐘暝度長林月沙
鴈寒迷蔓草烟畫閣人翻傷別調白蘋洲繫采芳船江南
塞北無窮意過眼流光又一年

思鄉懷古正難任又聽高城急暮砧青嶂雨餘秋色迴碧
天露重月華深陶潛五柳終成隱杜甫孤舟一繫心應是
眼前同調少病來三月不聞琴

年年秋色鼓笳中王事匆匆歎匪躬玉帳論兵纔北敵金
牌宣勅又西戎孤城畫角催殘照萬里黃雲沒斷鴻回首

江湖天漠漠荻花深處一漁翁

辛苦平生數卷書十年多事幾舟車夢懸魚鳥忘機處身
是風波利涉餘生入玉門真幸爾老思尊菜且歸與捲茅
昨夜風還雨破屋闕情是舊廬

莫漫逢秋浪自悲秋來風日總宜詩客中對菊猶貪采病
裏慵冠不怕欷心愛碧山還舊隱眼看疎竹更新枝芙蓉
江上憑誰問搔首無言憶所知

夜雨芭蕉思欲迷白頭吟嘯失羈棲翻秋舊路多荆棘稍
喜邊聲罷鼓鼙露下金盤天宇靜月明珠樹斗星低船頭
把酒悠然坐喔喔前村又曉雞

倚棹江天百感生倦扶筇竹且閒行蕭蕭紅葉夕陽下冉

冉白鷗秋水明飲量暗隨詩力退路岐真向老懷平蒼蠅
不省寒將至何處飛來漫作聲

短篷聊繫白蘋洲一夜寒生萬樹秋塞北風回蘇武鴈江
南月滿謝公樓金尊綠酒邀同賞青海黃沙憶壯游問道
病來眠食減詩成還似舊時不

聞新政時瑾賊伏誅

極知天意眷皇朝宗社神靈此鑒昭智比唐堯終極鯨仁
如虞舜罷征苗炎蒸直與秋風盡氛祲都憑喜氣消若問
漢家更化事舊時琴瑟聽重調

懷慶太行山有感

駐馬覃懷望太行感秋今古意同傷草心不遂孤雲變塵

夢空隨逝水長痛欲捫瘡憐冠準老思迴馭媿王陽二南
世業荒蕪在又負黃花一度黃

五月一日先皇帝忌辰志感二首

往事傷心恨未窮小臣身自際時雍人間何日忘弘治天
下茲辰痛孝宗海月不歸華表鶴殿雲猶逐鼎湖龍極知
鷓鴣瞻依地空戀丹宸想御容

趨朝長聽五更鐘清廟曾陪賦肅雍桑穀自消商太戊大
戎終屈宋仁宗身隨日馭瞻重曜夢繞雲衢從六龍欲寫
新詩歌舊德太平無象可形容

致仕志感二首

連章乞得老身回雨權風帆日夜催父老忽驚吾早到兒

童真問客何來新移菜竹和雲長舊種黃花帶露開輸卻
前時雙健腳病來無力更登臺

猶記垂髫薦日流光五十一回春黃扉不是養痾地白
首慙爲坐食人野性自便隨鹿豕歲寒相伴有松筠惟餘
一寸丹心在長向空山夢紫宸

汝成將別予邀飲逸老園再賦一首

乍逢仍別意躊躇暫憩南園水竹居菊露帶香秋澹澹柳
風入面晚徐徐祗緣抱病常辭酒縱使臨淵不羨魚莫笑
衰翁渾潦倒也能揩眼爲君書

暮春偶懷彭幸菴寄柬

西涯逝後誰知己南有雲莊北幸菴老去萍蓬驚浪跡歸

來風月但清談休官各詫林間一交道長懷益者二若向
寒暄論世味苦辛調盡合同甘

陸丞相祠用許多史韻

志作貔貅氣作城指天不作負恩生中原狗國無堅壘瀕
海勤王有義兵手挽龍髯空抱恨令傳虎旅竟吞聲新祠
故國瞻依地不盡懷忠弔古情

老朽誤蒙勅使存問有念舊尊賢之諭志感一首

老歸林下已華顛又見新皇御極年特勅遠頒勞問舊誤
恩非分媿尊賢心如野藿忠猶在身是疲駑力不前淺薄
未能歌帝德祇隨擊壤慶堯天

遊焦山次南山韻

老翁性本愛邱山已破浮生夢覺關坐引清風來竹塢望
迷春色滿桃灣百年湖海虛舟在萬里雲霄倦翼還且向
綠陰深處醉千金難博此身閒

弔竹逸何翁

隔歲生芻莫始成到門魚鳥亦含情長江自繞圖山麓故
里猶存竹逸名翁去者英誰主社我來風日正秋晴最憐
蕙帳揮觴處忍聽堂筵鼓吹聲
中年短髮已毵毵坐閱春秋八十三毀譽任人心不管苦
辛調我味同甘乘舟每動尋幽興揮麈頻同對客談空向
元龍樓上卧懷翁不見若爲堪

毛給事用成守制歸雲南過鎮江話別

舊遊自覺眼中稀老去真看萬事非二十年餘纔一叙八
千里外又言歸心同返哺慈烏恨身逐隨陽旅鴈飛留取
向來經國念此生忠孝莫相違

夏少卿於謫守茶陵道鎮江謁予遂菴賦贈

議禮年來聚訟頻力持國是屬吾人聖皇不爲求循吏遠
郡安能屈近臣世上令名完有幾古來公論定方真亦知
州牧非遷客把酒臨歧莫愴情

哭林見素先生

昨日雲莊凶問至朝紳相對總潸然寸心到死還憂國一
節平生不愧天故里樓臺無處起先秦文字有人傳報公
不獨名兼壽共說希文子象賢

再疊前韻自述

原韻係答吳中丞受詔敦迫上道祖

宴之作

黑髮動名半在邊晚登臺閣媿妨賢餘生又逐風雲會垂
老仍都將相權仙掌巖巖擎太華龍門混混控三川人言
熟路驅車易却恐駑駘力不前

謁寇萊公祠

半畝荒基數尺墻宋家賢相表新坊樓臺不用生前起祠
宇能延沒後香未拔一丁甯負國縱為孤注已尊王後人
不見親征策和議終成禍靖康

四月二十一日發陝城阻雨越二日乃行病目甚苦

風沙雨後浮塵盡洗時方憂旱眾情胥快口占一

詩志喜

一雨通宵便放晴紅塵消盡路歧平卽看麥隴圃枯槁可
是天河洗甲兵渭北輕烟浮遠樹終南佳色帶高城平生
亦是并州客白首重來漫有情

巡邊偶吟

一出頻看隴月圓朔雲回首隔晴川鄉心已落征鴻後行
色還當小雪前二三年來三建節六千里外五籌邊亦知
保障為長策全陝蒼生望息肩

渡江

去歲偶因西事起馳驅惟恃寸心丹恩綸却訝徵還早老
病真愁赴召難萬里雲霄飛鳥倦一江風雨釣舟寒太平

勳業諸公在獨卧山林夢亦安

送鳳山司徒秦公致政南歸

尙書何事賜歸頻聖主垂思念老臣白首恥爲乾沒態素
心不作詭隨人十年鎖闥憂民疏萬里江湖把釣身去住
祇應吾道在暫時分手莫傷神

送少保天卿廖公得請致仕還東光

赤日當天方苦旱四郊禾稼已無春民星正待騰南畢卿
月胡爲遠北辰歸去向懸憂國念老來兼作著書人春明
咫尺還家路風雨孤舟不問津

送湖廣馮總戎

奕代班周爵青年請漢纓龍沙三箭勇虎帳一裘輕提旅

參南帥還師衛上京廟謨歸懋簡物論仰先聲劍授親推
轂符分重總兵軍中稱大樹闔外得長城湖海英風遠乾
坤老氣橫指揮驅契猷談笑掃攬槍日擁飛龍陣塵消細
柳營邊書誰奏凱候火定無驚保障須材傑懷柔戴聖明
恩隨春共到操與玉兼清多士瞻儀度遐方識姓名敢論
文武異直遣德威并休戚憐吾土風謠感舊評貪功者誰
子遺虐枉蒼生俯仰嗟如昨瘡痍苦未平相逢煩軫念爲
別正闕情謾說蟬璫貴看留竹帛榮策勲宜慎始居寵務
持盈下榻從傾蓋投桃媿報瓊玳筵歌屢闋彩筆賦初成
芹獻非無補雞壇况有盟重來是何日回首動心旌

雜作題畫

明沙隱居名目卷之
幽泉出谷鳴疎竹和雲長微吟坐開襟梧桐月初上
萬卉皆顏色幽花性所宜年來雙病眼猶認傲霜枝

送張宗義之汴

作別本無近爲情俱可憐不知從此去明月幾回圓

口占漫談

歸鴈初從北官舟亦復南風塵嗟滿眼何處歇征驂

予歸自茅山路出金壇河口希宋約許彘史伯誠來
會舟中話舊久之解纜而別時漏下三鼓矣次日

寄詩爲謝

足音空谷遠能聞一笑相逢坐夜分舊事依稀談不盡明
朝回首隔重雲

再遊七峰

縹緲菴居與世分客來無語坐斜曛主人心事清於水不

贈青松贈白雲

右白雲菴

水氣蒼涼映閣虛石闌千外柳風徐莫嫌舉網渾無得適

興元來不在魚

右水雲舫

白鷗

秋盡長江白鳥飛平沙淺草故依依海翁底事勞相狎不
獨忘機已見機

阻風

舡頭飄葉掃成堆把酒推篷日幾迴猶勝蔡村村下泊一
燈風雨夜深來

藥欄漫興

花落花開歲月深省中一本直千金休將春色輕拋擲苦
盡前時種樹心
好花開遍故園春猶踏長安陌上塵我正憶花花咲我幾
時歸作灌花人

和西涯先生漫興

客至開尊各解衣愛山休問是還非酒闌客散夜初寂明
月自照主人歸
園亭風日入清秋綠樹重陰護四周頗恨青山看不見似
應別起看山樓

和涯翁漫興

老覺后山精力盡病愁元亮酒盃空百年強半歸何處多
在春花秋雨中

附錄

賜文襄公詩

明世宗皇帝

邇年西陲擾起卿督邊方三辭乃承命開心副予望
才兼文與武內外資安攘寬朕西顧憂遂使吾民康
公勤既昭著素名滿華羌勅使徃宣召復來坐巖廊
黃扉典政本擴誠以匡襄予奉祖宗緒志欲宣重光
深恐德弗類倚畀賴卿良展其平生志佐朕張皇綱
股肱職補袞伊周為昭彰助成嘉靖治青史留名芳
石涼楊文襄公傳

雷躍龍

公諱一清字應寧號遂庵先世爲滇之安甯人父景以化州同知致仕攜居巴陵少奇穎警敏能屬文有司以奇童薦爲翰林秀才憲廟俾內閣擇師教之與李文正東陽前後出庶子黎淳門年十四登北闈鄉試卽以經術爲人師十八成進士明年父喪解官卜塋京口遂卽丹徒家焉服除授中書舍人職務清簡弟子日益進凡經公指授者皆取高第顯名朝廷久之遷督學政力祛宿弊凡請託一以嚴絕之士大夫始有謹者久而服其公且明也丁母憂歸服除改督陝西學政尋遷副使公乃益自振勵劄正學書院選英俊其中躬自教督所識李夢陽康海呂柟暨馬理

張璿輩皆與焉公之詩文與書多效李西涯其功力差相伯仲也好談王霸經世大略材猷足法以是聲譽藉甚用超晉太常少卿尋晉南太常卿遷都察院右副都御史督理秦中馬政西蕃故饒馬必仰給中國茶飲去羶酪疾先是高帝著爲合以蜀茶易蕃馬資軍久而寢弛茶多闌出爲姦人利而蕃馬不時至公乃請重行太僕苑馬官嚴私通禁茶掌於官以服致諸蕃馬馬大集牧政用修給軍者日益稱足時李文正當國劉公大夏爲大司馬皆善公而才之會邊陲告警陝議遣將劉公言兵難遙度卽遣將以不時往楊中丞在彼可用也勅公巡撫陝西兼理經略邊

務公益選練士卒創築二城以爲固援又劾貪庸總
兵武安侯鄭宏及不職諸校尉數人去之適吐蕃數
萬騎入甯夏乘勝直趨固原烽火通於內地時總兵
曹雄軍隔絕不相聞公慮其失策乃從帳下輕騎僅
五千趨之眾爲公危請勿往公不聽星馳抵雄軍爲
之調度復張疑兵以脅吐蕃吐蕃移犯隆德會伏炮
夜發響應山谷吐蕃以爲大兵至宵遁塞外邊人士
以郭汾陽比之大司馬復議延綏甘肅甯夏等鎮兵
散無統請設都御史總制之上報可遂命公總制諸
邊開府固原尋晉右都御史公乃具疏極陳戰守之
策請修濬牆塹以固邊防增設衛所以壯邊戍經理

甯夏以安內附整緝鞏州以遏外侵悉許之公督諸
鎮士馬飽騰每按部旌旗戈甲耀原野間吐蕃不敢
駐牧近地公又謂河套卽古朔方地唐張仁愿築三
受降城自是無寇警請因險而牆之聯絡相應可制
敵而障全陝於數百里外廷議題之於是大發帑金
數十萬使公治築工未竟爲權閹劉瑾陰阻以是移
疾乞歸里工亦罷其成者在要害間僅四十里耳邊
人至今賴之公旣歸瑾復入讒語坐公冒餉逮下詔
獄李文正及王文恪力爭之始得致仕歸公歸京口
治私第得唐許刺史丁卯橋橋址圍之以詩奕飲酒
自娛顧名聲曰益盛適慶蕃寘鐺叛詔起公提督軍

務合總兵官涇陽伯神英西討以中貴人張永監其軍公馳至闕密諭公故部將仇鉞時亦被劫事叛者俾乘間捕執之遂悉誅縛其首逆何錦周昂等永亦旋抵壁上見公奇之公見永軍政之嚴相得歡甚初永與逆瑾侍潛邸爭寵不相下時頒賞諸部曲百餘人瑾之姻族毫不見與公固勸之始勉給一二乃顧謂公曰公無慮吾豈畏瑾者哉公曰固也第今權臣內而大將外公誠貴上誠重公保無中變乎永曰然則奈何公曰公宜亟歸乘上之見嚮聲瑾罪而誅之此千載一時也永悟歸即密疏發瑾諸謀反狀蓋公草也瑾伏誅上因進永柄司禮焉方永之入也留公

節制諸軍陝之軍吏氓士額首頌公勿歸顧朝議之趨召且迫也遂馳赴詔拜公戶部尚書論平叛功晉太子少保賜白金彩幣尋晉吏部尚書公於時政最稱通練而性廓大不飾邊幅愛樂賢士大夫與共功名朝有所知夕即登薦以是門生故吏徧寰宇嘗再帥關中麾下自徧裨起爲大將封侯佩印者纍纍也時大盜起躡中原公調悉機宜疏前後凡數上復薦用副使吳廷舉等力討平之再晉少保兼太子太保廕一子錦衣千戶中貴谷大用陸閭援張永例請封其弟姪伯爵詔報可公力疏止之不報給事中王昂論選法弊於公有所指摘上爲謫昂公力請寬之給

事中寶明及御史孟津等或以言事或與鎮守中貴忤諸繫詔獄者公上書求釋上亦間有所寬也乾清宮災公應詔陳言至指及乘輿出無定期止無常所且置番僧戒種於宮廷諸干成法事因自劾乞罷歸上爲溫旨慰留以原官兼武英殿大學士直內閣會災異公復自劾因極陳時政得失語甚激切上弗省是時張永坐閒廢江彬錢寧方倖用聞公疏弗善也於是使所私優人臧賢輩蜚語上前譏刺公又嗾故諸生朱大周誣訐公公乃上書乞骸骨疏至再四上始賜勅褒諭累數百言給夫廩逾常格以歸公歸後客日益進凡所摹畫朝事億度無爽時目之爲智囊

云宸濠之變公度鎮江扼江南諸鎮之吭能備可禦三吳失茲要害吳越潰莫支矣於是捐資募諸壯士復遣促臺使者調金山鎮海諸衛軍環備內外無慮數十萬武宗南征聞其備禦有策特幸公第顧問歡宴逾兩日曰暮賡咏篇什古今無儷焉時左右有導上幸浙江者公從容諷諫乃不果行世宗嗣大位廷臣爭言公可大用詔遣官賜金帛存問久之三邊總制缺詔公以少傅兼太子太傅改兵部尚書兼左都御史涖之溫詔褒諭以古吉甫方召唐之裴郭宋之韓范稱美之故相行邊蓋自公始也公之鎮凡諸軍吏幸公再涖愈自劾勵壁壘爲新上以舊勳凡有所

條請靡不報居末一載復詔入爲吏部尙書兼武英殿大學士既陞見卽晉少師兼官如故又以獻皇帝實錄成晉太子太師謹身殿大學士時首輔費文憲宏也會張文忠孚敬桂文襄萼以議大禮得上意驟貴爲宮詹兼學士而諸詞臣皆心鄙之以故詞林諸榮秩如講幄典試教習庶常皆不得與張桂於是深恨費文憲屢疏攻之去公復薦起弘治中故輔謝文正遷居首輔文正至則公已用陝捷加特進左柱國華蓋殿大學士秩居文正上矣公猶疏讓文正願居其次上弗許以是公居首輔文正亦旋謝病歸公旣以敏練見知一時士大夫皆崇仰之上益禮重公賜

御書和章及金幣牢醴無虛日復賜銀印記二一日耆德忠正一日繩愆糾謬所言邊務國計事無大小上悉傾聽之顯陵之不果遷則公力諍功居多也是時張桂益貴倖入內閣上之傾嚮且過於公會講構王文成守仁亦與孚敬相釁隙上以王文成諭公欲知其人公謂其有精忠大節可大用萼聞而循之於是孚敬遂疏謂三楊以後姦人占據揆地往復去來其人曰輕勢日重乞下嚴諭俾勿詭隨便己意如往昔蓋指公也公亦奏辦乞歸上兩爲溫旨以解之於公尤厚張桂於是益思構公矣先是公議散館留陸粲等數人爲翰林上難之孚敬密疏言此曹皆費宏

所植而一清成之勿留便於是陸燾等爲給事中公弗聞也燾給事省中時有建白公輒擊節稱歎謂而家敬輿不過燾內感公國士知禮部侍郎徐縉以次當柄用素謹事公又爲燾座右時時以上意語燾謂厭張桂榮思有所論列未發也會武定侯郭勛帥營務頗貪橫公奏對常盈庫出入計語頗侵之因薦用故中貴人張永同爲提督永遂發勛貪污跡俄而永暴卒中外頗疑中勛毒言路遂擊勛故以大獄事感孚敬每嚴事之於桂不爾桂亦密疏攻勛且謂張實庇之上於是下諸給事御史擊勛於公且諭以孚敬私勛必曲救令勿聽公偶泄之縉縉亦語燾也

給事孫應奎疏論張桂亦及公上是其論公上疏辭優詔勉慰至張桂疏各有策勵語公復上辭章謂今之持論多尙紛更臣獨勸以安靜多尙刻削臣矯以寬平欲變法臣謂宜守法欲生事臣謂不如省事用人則謂才難當惜斷獄則謂罪疑惟輕以故齟齬參差願賜骸骨避賢者路蓋指張桂也燾於是果疏劾張桂罔上行私諸罪狀上乃責張孚敬桂芻負君忘義令孚敬以原職回家劄悔資後用芻以尙書致仕而罪燾不早言逮下詔獄杖謫荒裔居二日復榜示朝堂明張桂功罪且令中外勿得更加齟齬孚敬陛辭上乃密諭公謂孚敬可還之閣否公言上欲還孚

敬固當第渙汗大號甫揚廷而遽改之非所以示天下信少遲孚敬至家而後召之使孚敬益憾公且疑祭疏公所授也於是張桂同事詹事霍文敏翰有齒寒之懼上疏力攻公公疏辨乞歸上溫諭留之而意已移矣孚敬至天津上使人以璽書召還復職公遂乞休益切上未許也張回見公愈偃然自負且謂公若吾在韜必不敢有是言公笑領之霍文敏以省毋給假因復爲桂辯寃攻公益力上報韜遂切責公非大臣體公謝以不職自陳上乃俞致仕予金帛令馳驛歸旣而霍文敏亦私心悔之矣公歸會進大學衍義不與公名上覽之不悅調修是書實肇於楊一清

又嘗序諸後可獨遺乎命補列名仍遣官齎賜金帛於其家羣議祀禮不一上復念公顧謂左右朕悞放楊一清歸若在彼能無決乎諸仇公者懼公復用乃嗾永門下之怨永及公者誣奏公嘗受永金玉及永死復以白金乞公爲誌銘乃詔奪公官命巡按御史追公所受永金如所誣數尋亦罷追或請公奏辯公則謂久當自白奚辯爲及公終又四年上念之復其官又十五年乃贈太保謚文襄則公所謂久而自白也公所著詩文有獻納稿及綸扉奏議玉堂前後集行於世凡所撰述則以石淙繫之蓋不忍忘先世故居也李文正費文憲霍文敏諸公皆爲石淙賦以頌

美之故世稱公石淙先生云

按雷躍龍先生字伯麟號石菴潯江府新興州人萬曆己未進士選庶常薦升禮部郎中魏璫熾盛躍龍獨無所往來璫籍家時朝士名刺皆滿惟無躍龍名莊烈帝重之不數年晉禮部尙書未幾以憂歸永明帝奔滇以故禮部尙書拜刑部尙書從駕西奔途中散失薙髮爲僧隱於騰越之雪山中或又云扈驛至緬死於咒水灘

根源謹注

祭少師邃菴楊公文

陸深

惟公一代偉人四朝元老出入將相青宮師保蓋天

之生我公也固將以爲世道計若乃公之所言實感哀升降之幾胡蓋棺之已定猶未辨乎是非嗚呼哀哉盛德大業完器兼資謀斷並出公實多奇故渾厚宏博所以養天下之元氣而變通神化足以繫斯世之安危豈道大者難容而忠誠或以兆疑嗚呼哀哉本朝學術孰使之昌前輩相業誰云最良昔三楊之藻潤共建績於渡江逮李薛之純正式以增復辟之光何我公之博達兼數公之所長嗚呼哀哉人亦有言萬里長城五百之運賢聖合并縱后皇之孕育固不知幾年而後成儻求才於夢卜亦將合千萬人以爲英公今已矣百口難名九京可作執鞭爲榮此舉

一世之所同悲而尤門生故吏之至情也深早承陶
治遠大是期動輒得罪徒負教知定若晚登公門特
荷恩慈幸託公之末照每相顧以得師忽山川之遠
氣指天日以何私當輻車之在駕奠一觴而陳詞嗚
呼哀哉淚止於斯

與邃庵閣老求表揚先德書

壬午

王守仁

某之繆辱知愛蓋非一朝一夕矣自先君之始托交
於門下至於今且四十餘年父子之間受惠於不知
蒙施於無迹者何可得而勝舉就其顯然可述不一
而足者則如先君之爲祖母乞葬祭也則因而施及
其祖考某之承乏於南贛而行事之難也則因而改

授以提督其在廣會征偶獲微功而見誦於當事也
則竟違眾議而申之其在江西幸平大憝而見構於
權奸也則委曲調護既允全其身家又因維新之詔
而特爲之表揚暴白於天下力主非常之典加之以
顯爵其因便道告乞歸省也則既嘉允其奏而復優
之以存問其頒封爵之典也出非望之恩而遂推及
其三代此不待人之請不由有司之議傍無一人可
致纖毫之力而獨出於執事之心者恩德之深且厚
也如是受之者宜何如爲報乎夫人有德於己而不
知以報者草木鳥獸也櫟之樹隨之蛇尚有靈焉人
也而顧草木鳥獸之弗若耶顧無所可效其報者惟

中心藏之而已中心藏之而輒復言之懼執事之謂其藐然而罔聞知而遂以草木視之也邇者先君不幸大故有司以不肖孤方煢然在疚謂其且無更生之望遂以塋祭贈謚爲之代請頗爲該部所抑而朝廷竟與之以塋祭是執事之心何所不容其厚哉乃今而復有無厭之乞雖亦其情之所不得已實恃知愛之篤遂徑其情而不復有所諱忌嫌沮是誠有類於藐然若罔聞知者矣事之顛末別具附啟惟執事始終其德而不以之爲戮也然後敢舉而行之

寄邃庵閣老乞誌銘書

壬午

王守仁

孤聞之古之君子之葬其親也必求名世大賢君子

之言以圖其不朽然而大賢君子之生不數數於世固有世有其人而不獲同其時者矣又有同其時而限於勢分無由自通於門牆之下者矣則夫圖不朽於斯人者不亦難乎痛惟先君宅心制行庶亦無愧於古人雖已忝在公卿之後而遭時未久志未大行道未大明取嫉權奸斂德而歸今則復長已矣不孝孤將以是歲之冬舉葬事圖所以不朽者惟墓石之誌爲重伏惟明公道德文章師表一世言論政烈儀型百辟求之昔人蓋歐陽文忠范文正韓魏公其人

也所謂名世之大賢君子非明公其誰歟不幸而生

不同時也則亦已矣幸而猶及在後進之末雖明公

固所不屑揮之門牆之外猶將冒昧強顏而入焉况先君素辱知遇不肖孤又嘗在屬吏之末受教受恩懷知己之感有道誼骨肉之愛邇者又嘗辱使臨弔寵之以文詞惻然憫念其遺孤而不忍遽棄遺之者是以忘其不孝之罪犯僭踰之戮而輒敢以誌爲請伏惟明公休休容物篤厚舊故甄陶一世之士而各欲成其名收錄大小之才而惟恐沒其善則如先君之素受知愛者其忍靳一言之惠而使之泯然無聞於世耶不腆先人之幣敢以陸司業之狀先於將命者惟明公特垂哀矜生死受賜世世子孫損軀殞命未足以爲報也不勝惶悚顛越之至

寄邃庵閣老論相業書

王守仁

自明公進秉機密天下士大夫忻忻然動顏相慶皆謂太平可立致矣門下鄙生獨切至憂以爲猶甚難也亨屯傾否當今之時舍明公無可以望者則明公雖欲逃避乎此將亦有所不能然而萬斛之舵操之非一手則緩急折旋豈能盡如己意臨事不得專操舟之權而僨事乃與同覆舟之罪此鄙生之所謂難也夫不專其權而漫同其罪則莫若預逃其任然在明公亦旣不能逃矣逃之不能專又不得則莫若求避其罪然在明公亦終不得避矣天下之事果遂卒無可爲歟夫惟身任天下之禍然後能操天下之權

操天下之權然後能濟天下之患當其權之未得也其致之甚難而其歸之也則操之甚易萬斛之舵平時從而爭操之者以利存焉一旦風濤顛沛變起不測眾方皇惑震喪救死不遑而誰復與爭操乎於是起而專之眾將恃以無恐而事因以濟苟亦從而委靡焉固淪胥以溺矣故曰其歸之也則操之甚易者此也古之君子洞物情之向背而握其機察陰陽之消長以乘其運是以動必有成而吉無不利伊且之於商周是矣其在漢唐蓋亦庶幾乎此者雖其學術有所不逮然亦足以定國本而安社稷則亦斷非後世偷生免死者之所能也夫權者天下之大利大害

也小人竊之以成其惡君子用之以濟其善固君子之不可一日去小人之不可一日有者也欲濟天下之難而不操之以權是猶倒持太阿而授人以柄希不割矣故君子之致權也有道本之至誠以立其德植之善類以多其輔示之以無不容之量以安其情擴之以無所競之心以平其氣昭之以不可奪之節以端其向神之以不可測之機以攝其奸形之以必可賴之智以收其望坦然爲之下以上之退然爲之後以先之是以功蓋天下而莫之嫉善利萬物而莫與爭此皆明公之能事素所蓄而有者惟在倉卒之際身任天下之禍決起而操之耳夫身任天下之禍

豈君子之得已哉既當其任知天下之禍將終不能免也則身任之而已身任之而後可以免於天下之禍小人不知禍之不可以倖免而百計以求脫遂致釀成大禍而已亦卒不能免故任禍者惟忠誠憂國之君子能之而小人不能也某受知門下不能効一得之愚以爲報獻其芹曝伏惟鑒其忱悃而憫其所不逮幸甚

奉邃菴先生書一

李夢陽

草莽中伏聞謝柄歸里卑懷無任喜慰比遇張先生言眠食安健門客往來者如常也則又慰又喜某私計不謁杖履奉道顏今十年餘矣雖耳聾效日和醉

神馳心注無殊曩昔然悲離隔慕親接於衷莫之寬也壯歲性狂膽麓高視獨行四方是負意之所拂投冠便往以爲軒冕之耀不若邱壑爲安於是一擬江左再圖襄漢心勇跡阻竟還舊樓才弱成寡自鄙自嗤去年室人喪亡子蠢孫孺家事埤躬顛毛漸種種矣夙志謂何臨鏡竊嘆邇卜域釣州大陽山其地泉石幽曠想於茲焉老矣南望門牆豈勝瞻戀

奉邃菴先生書二

李夢陽

愚無似然陶範懷德景行慕履真仰如日月親如父母無日忘之無時忘之顧經霜逾暑左右訊缺音黑載疎斯窮居寡接因循自阻之故非敢忘大昧深安

下而恬汙也年來自惟復駕焉求之義杜門絕游葺
室廬闢田園爲終焉計然猶多口是憎身非蛾眉羣
妬奚來死生有命聽之而已戊寅之歲再舉一兒去
年一乳兩兒皆幸生活通家骨肉敢附以聞虞萬里
行草次布白不勝惶懼

奉遂菴先生書三

李夢陽

李公嘗上書詆張鶴齡鶴齡摘疏中有陛下厚
張氏語謂訕母后爲張氏坐下獄當斬賴孝宗
知其寃得不坐所謂疑似之迹也

張陶二客比數往來以是得聞起居爲詳爲慰某疑
似之迹市虎成真而勘臣遂以殺人媚人爲心鈎織
窘辱無所不至幸素翁當道疑剖似解不贊言說大
誣明釋某嘗自鄙亦嘗自幸自鄙者疎亢弗容於時
自幸者元老碩公取爲要駕之馬目爲磊砢之材也
某反觀私計平生不敢爲汙下苟且之行卽遭擠陷
不敢爲門墻玷也

奉遂菴先生書四

李夢陽

伏念曰者途館趨侍河舟登別踟躕春野仁望風帆
感慨今昔衷曲悽惋憶在冲年獲叨鎔範萍蓬飄逐
忽焉衰暮公逾七秩愚過半百曾不信宿復此違隔
人非木石誰堪此懷也大作十册校定者九遺者自
訟藁且愚嘗靜緘潛究推求旨緒西巡諸作矜持嚴

整大而且化立朝諸作廊廟冠冕俊拔典則邊塞諸
作忠誠奮揚規畫概見歸田諸作幽眇流行情渙意
層變化百出矣揆厥原本蓄厚決沛蘊深光淵故觸
之則發驅之則伏寫之無逸景用之無梗事鋪之無
留情遂使工辭者畏其渾淪負氣者讓其雄高攻意
者服其巧妙雖唐宋調雜古今格混瑜瑕靡掩軌步
同一然所謂千慮一矢者也一代名筆後必有知子
雲者縷縷之談未及面陳敢附此以聞

關中奏議金集序

甘肅楊博

故少師遂菴楊公關中奏議蚤已刻之江南海內之
人爭相傳誦久矣侍御淮南白厓劉君來按洮河以

公宦跡遍滿三秦反無鏤板誠爲缺典乃手次其類
爲茶馬爲巡撫爲總制凡一十八卷一百九十八篇
副憲使齊雲江氏重刻之屬博爲序憶昔博在職方
邊報旁午每當艱大不能剴決輒於故牘中取錢塘
青神鈞陽華容諸先正并公之遺稿讀之如寐而覺
如矇而瞭昌言壯猷充可底績是豈口耳詞章者所
能到哉人亦有言作於聖故曰經述於才故曰文不
知經與文其道一也典謨訓誥臯夔伊傅之所以詔
其君者也施諸寰宇則勳望赫然布在方策則文采
爛然是故經而不文則野文而不經則史經與文果
異乎哉公雄才遠識殆若天授其叙事則詳雅典則

泰山喬嶽屹然不動其摘詞則明白疎粲長江大河
一瀉千里明體適用雖謂之經可也武功康對山太
史嘗稱公文武之道將相之業上培國家億萬年之
基下啟士大夫千百世之緒非誠哉知言者乎侍御
君言念西陲頃者屢上封事經濟之學昌大之氣酷
與公類夫自古豪傑之相知美則愛愛則傳然則是
舉也侍御君固不得不任其責矣嘉靖庚戌夏

關中奏議全集序

南京兵部尚書韓邦奇

奏議少師大學士遼菴楊翁先後蒞關中經略疏也
弘治中孝皇用廷臣議勅翁以御史中丞督馬政嗣
改撫全陝未幾授鐵總制三邊正德中以大學士謝

事歸今上以大司馬兼御史大夫起復總制奏議事
類三茶馬巡撫總制卷十八凡一百九十八章大抵
皆籌邊策也先以板行然各爲一帙侍御劉公哀而
爲一復刊之蓋期逃流遐布風斯世也公卽以序屬
奇翁督學政時以國士遇奇侍御公又素以斯文相
愛者安可以衰病不文辭夫國之大事在兵而邊兵
爲尤大邊務者在今時尤當急於講求而不可忽者
也仰惟我高皇訊掃胡元再造華夏殊方絕域莫不
奉貢稱藩我文皇提兵北狩三犁虜庭殘虜駿奔遐
竄莫敢向南發一矢中國之盛未之有也今我皇上
中興敷賁一德格天四夷來王克紹先烈昭明協和

之化萬國同風其於武事若可緩者然秦宜思陟豐
慮日中聖帝明王儆戒之道常欲無虞之時自古繼
體之世太平之盛莫過於成康當其時越裳重譯刑
措不用周公告成王則曰誥爾戎兵召公告康王則
曰張皇六師二公豈以威武導主者艱貞於泰明動
於豐古之人爲國深長思也故曰邊務者在今時尤
當急於講求而不可忽者也翁之文章著在關陝侍
御公獨取是編而表章之揚先烈作國兵先平期弗
陂中期弗戾保豐泰於無疆忠愛之意深矣翁之遺
教宏矣若是編也燦若景星人所快覩奇也安能贊
一辭嘉靖二十九年夏五月

關中奏議全集序

陝西監
察御史劉崧

關中奏議者前少師遂菴楊公在關中時所上諸疏
也公幼以神童被薦入讀中秘書繼登甲科官近侍
當是時隱然名重京師人無不以吉甫方叔望之矣
旣而以臺諫疏舉才足經濟廼膺廷推出督陝右馬
政尋兼巡撫總節制復起而至者再計出入邊方三
十餘年故諸所建白樹立不爲不多其在關中者不
啻十之五也舊刻在京口爲公故里然略而未備傳
布未廣有事西土者往往以購求爲難余承乏入關
凡所事事率皆公已試之迹其所經略邊方諸務迺
通儒宿帥咸謂數十年來用之不盡吁今西事亦孔

棘哉舍桀燹以爲方外正鵠而求中奚其可愛屬憲副齊君宗道少叅劉君世用彙分目列梓之闕南便有事也後以督府奏議續之通前爲卷九十有八總爲全集於戲邊事其有賴哉以今攷之實戎務有若馬政諸疏馭番夷有若修復諸疏固疆宇有若兵儲諸疏慎用人有若舉劾諸疏禦大虜有若調度諸疏勵人心有若賞罰諸疏其間山川之險夷道里之遠近虜情之出沒戰守之機宜披讀之餘較若指掌信乎鴻猷偉畫傑識遠思非若經生俗士腐議虜聞剽掇前人之緒餘以資後世之口實初無關於時事輕重者之言也如公可不謂經濟才耶自昔以奏疏名

家者漢賈傅唐陸宣公其人而權載之之論拳拳以才位時命爲言歸之所遇說者以爲慟哭數語終非感悟之機懇懇萬言要失將順之美固亦不能無遺議焉惟公當國家付畀之隆繫中外倚重之望故能乘時匡力隨事納忠孚動轉移言無不用卒之寵位日崇而膏澤以下卽百年來稱遇主者莫不曰遂菴公云是二子之才固不能加於公之所有公之所致將不慊於二子之所無耶或曰公自解機務絕口不叙西鄙勦伐刻之傳勿乃非公意乎是不然充國在漢名將也西塞名還人或請遜其功曰不言後將奚法矧斯集經略皆足安夏攘夷故終公在位之日虜

人不敢南近塞垣此外無餘術也豈直金城所上方
略已耶詩曰方叔元老克壯其猷又曰文武吉甫萬
邦維憲是集有焉若之何其弗傳也雖然傳者奏議
也猶曰關中焉豈其一斑歟公之全固不在是也有
國史在焉嘉靖二十九年庚戌春三月望日

過安甯州有懷書石淙詩草後劍川趙藩

連然山色鬱蒼蒼落日孤城草樹荒劫火可憐燒不
得一樓鐘鼓屬文襄

碑銘門下表升菴全史能將數語涵惟有石淙幽咽
水似憐居士老江南

詩筆雄渾逼浣花並時低首有西涯卽拋勛業論風

雅旗鼓中原一大家

傅趙錢程接踵生靈鍾山水稱扶輪春江一夜浮萍
長莫以何郎粉浣人

京口懷楊文襄公

永昌 袁文揆

丁卯橋邊築石淙敢因身退遂迷邦賡歌一旦迴巡
幸舊恨二邊說受降贏得名山充錦橐頻邀舊雨對
春缸天心似忌歸田早不許先生臥北窗

再膺將相亮天工自是君王禮意隆得罪非專因桂
萼救時端不愧姚崇光明心跡憎多口宏獎風流總
至公我是鄉人美鄉水欲憑浮玉障江東

過楊文襄公故里

永昌 范仕義

螳川浩瀚毓靈奇名士端從夙慧知公幼舉神童四代元

勳歸柱石九邊雄畧擁旌旗智囊早見除姦日宸眷

仍聞致政時老向竹林栖息處石淙猶有故園思石淙

係安甯地名公之遺集以此命名不忘本也



李曾別三靈... 丁... 京口... 具... 謝... 蘇...

